



Sud Bosne i Hercegovine
Суд Босне и Херцеговине

Broj: S1 3 Iž 031461 18 Iž
Sarajevo, 14.01.2019.godine

Sud Bosne i Hercegovine u Sarajevu, u Apelacionom vijeću sastavljenom od sudija dr Branka Moraita kao predsjednika vijeća, Mirsade Džindo i Zvezdane Antonović kao članova vijeća, odlučujući o žalbi žalitelja Izudina Bosnića, ul.Lubarda broj 74 b, Bužim, izjavljenoj na Zaključak Centralne izborne komisije Bosne i Hercegovine, broj : 05-1-07-3-753/18 od 04.01.2019. godine, u nejavnoj sjednici, održanoj dana 14.01.2019. godine, donio je

R J E Š E N J E

Žalba se odbija .

O b r a z l o ž e n j e

Zaključkom Centralne izborne komisije BiH (u daljem: CIK BiH), odbačen je podnesak tužitelja od 26.12.2018.godine , kojim je tražio da CIK BiH ponovo odluči o njegovom povlačenju kandidature.

Protiv ove odluke žalitelj je uložio žalbu u kojoj ističe da je pobijana odluka nepravilna iz razloga što smatra da je istom došlo do pogrešnog tumačenja odredbe člana 4.10 stav (6) Izbornog zakona Bosne i Hercegovine . Navedena odredba se trebala tumačiti u širem smislu , jer je on u konkretnom slučaju povukao kandidaturu iz razloga zdravstvenog stanja o čemu je dostavio i medicinske isprave. Ovakva odluka i izborni zakon su po njegovom mišljenju u suprotnosti sa temeljnim ljudskim pravima predviđenim Evropskom konvencijom o ljudskim pravima i to prije svega pravo na slobodu mišljenja i slobodu izražavanja. Uz žalbu je priložio i novi medicinski nalaz od 03.01.2019.godine.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Nakon što je ispitalo pobijani zaključak vijeće Apelacionog odjeljenja Suda Bosne i Hercegovine je zaključilo:

Žalba nije osnovana.

U konkretnom slučaju CIK BiH je utvrdila da je žalitelj Izudin Bosnić, nezavisni kandidat za učešće na prijevremenim izborima za načelnika općine Bužim dana 26.12.2018.godine podnio lično CIK-u BiH zahtjev za ponovno odlučivanje o povlačenju kandidature.

CIK BiH je utvrdila da u konkretnom slučaju, nema uvjeta za pokretanje postupka iz razloga što je odredbom člana 4.10 stav (6) Izbornog zakona Bosne i Hercegovine propisano da nakon ovjere, nezavisni kandidat ne može povući kandidaturu.

Ova odredba zakona je pravilno primjenjena u konkretnom slučaju iz razloga što je ista jasna i ne ostavlja nikakvu dilemu u pogledu pravilnosti tumačenja iste. Nije sporno da je prijava žalitelja, kao nezavisnog kandidata za učešće na prijevremenim izborima za načelnika općine Bužim koji će se održati 17.02.2019.godine, ovjerena i to je osnovni razlog zbog kojeg je žalba žalitelja neosnovana, a njegovi navodi kojima ukazuje da se navedena norma trebala tumačiti ekstenzivno, iz razloga što se radi o povlačenju kandidature iz ličnih razloga tj. lošeg zdravstvenog stanja, nisu od uticaja na drugačije odlučivanje u konkretnom slučaju.

Naime, u konkretnom slučaju radi se o postupku u kojem je potrebno utvrditi da li je povrijeđeno izvorno pravo žalitelja ili nije.

Žalitelj neosnovano ukazuje da je ovakom odlukom došlo do povrede temeljnih ljudskih prava predviđenih Evropskom konvencijom o ljudskim pravima, jer upravo iz odredaba Izbornog zakona BiH, naročito poglavlja 4. proizilazi da je omogućeno pravo na slobodne izbore svakom državljaninu Bosne i Hercegovine, jer svojom voljom podnosi prijavu za učešće na izborima, ali pored ovog prava podnošenjem prijave svaki građanin preuzima i obaveze utvrđene izričitim odredbama Izbornog zakona Bosne i Hercegovine, kako u pogledu dostavljanja propisane dokumentacije uz prijavu da bi bila ovjerena za učešće na izborima, tako i činjenicu da je dužan poštovati i sve ostale odredbe izbornog zakona pa između ostalog i odredbu člana 4.10 stav (6) iz koje jasno proizilazi da nakon ovjere, nezavisni kandidat ne može povući kandidaturu, jer se radi o obligatornoj pravnoj normi.

Prema tome, u konkretnom slučaju, bez uticaja su razlozi zbog kojih žalitelj želi da povuče svoju kandidaturu iz razloga što mu prema citiranoj odredbi ne pripada pravo na povlačenje kandidature nakon ovjere kandidature.

Kod ovakvog utvrđenja, ovo vijeće se nije upuštalo u dalje ocjene vezane za pitanje utvrđivanja okolnosti zdravstvenog stanja žalitelja.

U konkretnom slučaju pobijani zaključak CIK BiH je donesen pravilnom primjenom navedenih odredaba Izbornog zakona BiH („Sl.glasnik broj : 23/01 do 31/16).

Iz navedenih razloga Apelaciono upravno vijeće – Apelacionog odjeljenja Suda Bosne i Hercegovine nalazi da je pobijani zaključak CIK BiH pravilan i zakonit, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik broj: 19/02 do 74/10) valjalo odbiti.

Predsjednik vijeća
Sudija
Dr Branko Morait